


說鈴

續集三



池北偶談中下

內閣文庫			
三七函	二四冊	三七號	漢書類

漢書門			
二四冊	一〇函	三七號	類

內閣文庫		
番號	漢	3170
冊數	24	(23)
函號	371	51



池北偶談



談故

特賜進士及第

戊戌春 世祖親覆試江南丁酉貢士以古文詩賦拔武進吳珂
鳴第一是年禮闈榜後 上諭特賜珂鳴進士與中式舉人張貞
生等一體殿試尋改庶吉士同時崑山葉方藹試瀛臺賦甚工
上深喜諭年已亥秋復行會試葉中式賜一甲第三人及第

部曹入詞林

郎中與司業較俸陞內院侍讀自張允欽始內院詞臣與臺省一
體年例外轉監司自宋之繩始尋皆罷不行吏部自十八年停內

濟南王士禛

濟南王士禛

濟南王士禛



陞與五部一例選即金拱敬以加銜僅得太僕寺丞康熙九年始復故云

二程後

康熙八年 車駕幸太學後允御史傅世舟請求二程子後千
南樞臣以明道二十一代孫宗昌伊川 二代孫延祀名上俱
為五經博士如朱坤例坤歛文公裔也十二年衍聖公孔毓圻疏
請以子張子裔孫頴孫好賢為博士某年湖南巡撫請以濂溪裔
孫周冕為博士部議皆格不行

上考

癸卯甲辰之間更定內外官考滿之例營競紛然未敢入取罷因
話錄載裴充為大常寺大祝語卿長曰本設考課為獎勤勞若一
以官高下為優劣則卿合上 考少卿合上中考丞合上下考主
簿合中考協律合下考某等合喫杖語雖諧謔實切情事古今一
轍可歎也

配享

宋初定帝王廟配享功臣多不愜人意者如魏武以荀攸程昱配
文帝以賈誼王朗配唐玄宗配享不及曲江廣平肅宗配享不及
汾陽鄴侯皆不可解

復內閣

康熙九年十月內院復為內閣復翰林院官屬一遵順治十五年
之舊以圖海巴泰為中和殿大學士兼吏部尚書索額圖李蔚為
保和殿大學士兼戶部尚書魏裔介杜立德為保和殿大學士兼

禮部尚書對哈納為文華殿大學士管刑部尚書事折爾肯哈占為中和殿學士塞赫達都為保和殿學士馬朗古張鳳儀為文華殿學士靳輔為武英殿學士田種玉為文淵閣學士陳欽永為東閣學士折庫納熊賜履為翰林院掌院學士俱兼禮部侍郎
傳而都嘉利亞國

康熙巳酉大西洋傳而都嘉利亞國貢使瑪訥撒爾達聶入貢有旨諛國從來未通中國凡賜賚皆加一等其人物貢物與荷蘭略同

起居注

康熙十年二月講筵初開工部尚書王熙翰林學士兼禮部侍郎熊賜履進講大學康誥曰克明德章及尚書人心惟危道心惟微

二句三月禮科給事中吳國龍疏請復設起居注得旨報可

葉樹監搜

文昌雜錄載元相詩松門待制應全遠葉樹監搜可得知云唐時殿門外有葉樹監察御史監搜之位為唐制百官入宮殿門必搜御史掌之太和中乃下詔宰臣奏事停其監搜云云康熙初御史李秀奏請百官佩刀雖上殿奏事亦爾後李御史棠疏罷之

俄羅斯

俄羅斯國以順治十七年遣使入貢不知正朔自稱一千一百六十二年

特恩賜會試

順治乙酉鄉試山東法若真以五經疏聞于朝特旨授中書舍

人仍與會試丙戌遂入翰林其弟若貞同科進士給事中

難蔭異典

順治中御史張煊以忤溧陽相死世祖皇帝親政後特以其子諸生基遠為太常少卿累陞兵部侍郎外遷蘇松兵備副使康熙中直督尚書朱昌祈直撫尚書王登聯中法死上親政後其子頌寃以朱之子紱為兵部督捕理事官王之子盛唐為大理寺少卿

兩五經入翰林

康熙丁卯順天鄉試海寧查嗣韓候官林文英皆以五經疏聞特賜舉人明年戊辰俱中式嗣韓榜眼及第文英庶吉士

土魯番表文

土魯番自順治十三年入貢至康熙十二年國王瑪墨忒塞伊忒

韓後遣其臣兀魯和陞等獻馬其表略云土魯番國王其上言於乃聖乃仁天下治平皇帝陛下恭惟皇上一統攸同何異于古之占什特惠澤群生相同乎昔之達刺汗法紀軍威比隆于楷黑塞勞聰明格物媲美乎伊思謙達爾皇上睿知天錫如日升之無不照皇上撥亂為治如月恒之無不臨旌旂閃爍超越乎墨烏威爾皇恩浩蕩實出于度量寬仁國祚無疆而萬國咸寧洪福靡際而皇圖應運後稱一千八十三年二月二十八日子恭在禮部見荷蘭暹羅琉球諸國表文用金花箋文義皆如中國或謂是閩粵人代作也

北岳祀典

五岳皆祭于山獨恒岳祭上曲陽自漢宣帝神爵元年始而恒山

寔在渾源州相傳舜望于山川北至大茂山大雪不能前有石飛
墮遂祀焉即今曲陽廟石長不滿丈闊僅四尺餘濮陽蘇穀原
祐侍郎疑石晉後燕雲隔遼宋遂遙祀于此然史漢唐書之文明
甚不始宋也沈存中筆談云北兵謂之大茂山半屬契丹以大茂
脊為界兵祠舊在山下石晉之後稍遷近內今祠乃在曲陽云
蘇說本此也明弘治中馬端肅公曾請改祠于山事下禮部竟格
于倪文毅公按南園漫錄云倪公父謙常奉命祀曲陽禱于神
指旁侍一人與之遂生公因名岳以是固執不肯改祀云熈治十
七年上允刑科給事中粘本盛之請罷曲陽廟祀渾源千年
因循之訛至是始釐正焉

却鸚鵡

康熙二年西邊大帥某得黃鸚鵡以黃金作籠表上上却其獻
嚴飭之

補鄉試

自庚申已後諸僭逆以次削平各省次第補行鄉試故福建有庚
申科主考戶部郎中劉元勳大理寺評事白夢鼐廣西貴州皆壬
戌科廣西主考翰林院編修喬萊刑部員外郎楊佐國貴州主考
翰林院編修沈旭初戶部主事鍾呂雲南四川皆癸亥科雲南
主考翰林院編修米漢雲戶部主事高瑄四川主考翰林院編修
方象瑛吏部文選員外郎王材任

中堂

明洪武十五年設內閣大學士上命皆于翰林院上任十八年又

命殿閣大學士左右春坊大學士俱為翰林院官故院中設閣老座于上而掌院學士反居其旁諸學士稱閣老曰中堂以此按湘山野錄錢希白見王冀公欽若戲曰中堂遂有如此宰相乎又聞見錄富鄭公與康節食筍公曰未如中堂骨董之美云元王惲秋澗有中堂事記云元初中書省事皆前此矣

起居注

明初甲辰年設起居注秩正四品以宋濂魏觀為之吳元年改正五品後草十四年復設改正七品以單仲立為之以後草萬曆初張位始請復設江陵相定議以修撰編檢史官充日講者日輪一員記注起居兼錄聖諭詔冊等今日之制即本江陵遺意也蓋明初起居注別為專官而後乃歸之史官兩然今制自掌院掌卷以下皆得充起居注官不專史官此其異也按唐六典起居郎二人從六品上掌錄天子之動作法度以修記事之史屬門下省起居舍人二人亦從六品上掌錄天子之制誥德音以修紀言之史屬中書省此即古左右史之分職至明而合為一官今仍之耳

郊勞

安親王平湖南康親王平閩粵章泰貝子平滇黔凱歸上皆郊勞于蘆溝橋西二十里諸王都統滿漢大學士尚書侍郎阿思哈尼哈番以上大臣皆從既至詰朝皇帝對天行三跪九叩頭禮諸王大臣及出征王將軍等隨行禮畢上御黃幄諸王大臣侍班鴻臚寺引出征王將軍等朝見行三跪九叩頭禮上畢賜茶四

宮

禁師生

唐人五代最重座主門生之禮明代尤甚高曆中門戶既成一為師生終身以之惟嘉靖八年張璁霍韜為主考戒諸生不得修弟子禮本朝沿明之舊順治十五年戊戌科給事中胡悉寧建言鄉會試不分經房不稱師主至康熙十八年己未科始復分房舊例而師生之禁仍舊

初選方面

順治己丑會試後以兩廣初六需人遂用新進士候銓者二甲授叅議三甲授知府進士釋褐即為四品監司郡守蓋初例也然止此一科為然

巡方

世祖皇帝時用部主事及中書舍人行人評事博士等官假監察御史銜巡按各直省差竣都察院殿最之最者得內陞京堂五品餘則仍回居本職不真授御史也後仍歸御史而巡方亦停止遺康熙六七年間復用各部郎中以監察御史銜巡視鹽課未幾復舊

土黑勒威勒

順治中百官罰俸者有土黑勒威勒之名康熙初尚沿舊制未以停止

大中

明太祖初定天下建國號意在大中既而祈天乃得大明故當時

錢文有大中通寶

發陵

康熙二十二年陝西平涼府盜發韓康王定王二家法司按律擬罪上以發掘前代帝王陵墓特令加等因諭歷代帝王陵應加守家人戶下九鄉雜議并禁稱故明廢陵等語聖諭云凡云廢者必如高煦等有罪廢為庶人然後可彼生為藩王誰廢之耶上之仁明如此

會元解元入翰林

世祖極重科名自丙戌迄己亥會試第一皆入翰林惟丁亥李人龍不與後以閣薦為中書舍人壬辰程可則以磨勘被黜乙未同年伊翕菴闕舉進士引見南海子上顧學士曰此人山東解元

也遂改庶吉士後授御史官至都御史巡撫雲南自辛丑至庚戌例又一變康熙癸丑上以會元韓莢為狀元榜中解元皆改廢常丙辰亦以會元彭定求為狀元乙丑以會元陸肯堂為狀元此一榜解元亦然遂為定例人遭逢固有幸有不幸也按夢梁錄宋時中省魁者殿試有陞甲恩例前十名亦如之

外國封使

國朝聲教之遠梯航至者數十國而受封遣使者惟安南琉球二國安南又凡三遣始則康熙三年諭祭黎維禔奉使者侍讀學士程芳朝繼則康熙五年冊封黎維禔奉使者編修吳光也六年八月維禔遂都統使莫元清奪其諒山高平地元清奔皈朝兩廣守臣以聞七年遣使宣諭則侍讀李仙根職方主事楊兆傑為正副

使琉球封王順治中遣給事中張學禮行人王垓為正副使居閩
數年罷歸康熙初復遣時張已故御史王已遷戶部郎中矣康熙
十一年暹羅請封 上以海道寫遠令以 敕印付其使臣帶往
事理甚便而亦不失柔遠之體按嘉靖二十年降安南國為安
南都統使司仍以莫登庸為都統使國初定粵莫敬耀來歸未受
爵卒授其子元清都統使黎維禔亦來歸未受封卒子維禧立康
熙五年冊封維禧安南國王康熙二十一年琉球安南復入貢遣
編修孫卓儀制司郎中周燦往安南檢討汪楫中書舍人林麟焟
往琉球二十三年暹羅復入貢云

殉葬

八旗舊俗多以僕妾殉葬朱御史小晉裴始建議禁止得 旨允

行朱歷官至戶部侍郎

試錄齒錄

科場試錄齒錄其來已以東觀奏記載鄭顯知舉宣宗索科名記
顯屬祠部員外郎趙璘採訪諸家科目記撰成十三卷始武德元
年至大中十年敕付翰林自今放榜後並寫及第姓名及所試詩
賦題目進入內仍仰所司逐年編次明三百年鄉會試并沿其制
康熙初停止至庚戌會試乃復舊例鄉會試錄仍進呈乙卯鄉試
以兵餉不足再停止尋又復

布政陞尚書

李文達公天順日錄載天順二年以山東布政使陸瑜為刑部尚
書四年以朝覲官布政使蕭昺為禮部尚書又欲以布政使賈銓

說鈴 池北偶談

為戶部尚書不果明盛時中外用人如此天啓時以布政使張五
典為兵部尚書則以其子御史銓死節益異數也本朝順治中布
政使往入為侍郎康熙初定品級考布政使內陞止于太常光
祿卿而不及太僕何也

闕謚

予鄉裕禎名臣闕謚者如鍾司空龍淵羽正畢司徒白陽自曹司空
見素瑋先太師大司馬霖宇公家其尤著者曹通議葆素珍司空
之兄也躬行寔踐號為醇儒品不在龍淵先生之下然名位稍卑
例不得謚竊謂朝廷易名重典亦顧其人何如耳今例尚書以上
乃得謚國史三品以上乃得立傳其以名位湮沒者多矣近王給
諫北山日高疏請死節諸臣不必拘定品級皆當予謚以鼓忠義

氣其論甚正格于部議不行

歐陽從祀

今言嘉靖中議祀典進后蒼文中子胡瑗歐陽修四人從祀歐陽
以濮議故予敬特進之也予謂歐陽公人品學術亦自不愧然
以世廟君臣之私進之則謬矣公之主也以此負謗其歿也以此
從祀所謂求全之數不虞之譽者也

文武互用

本朝用人器使有不拘文武資格者以武臣改文職如順治中總
兵官李國英改四川巡撫後為總督川陝兵部尚書總兵官胡章
改山東右布政使游擊王肇春黃明改知府以文臣改武職如莊
浪道叅議朱衣客改隨征四川總兵官吏部侍郎陳一炳戶部倉

荒餘池北偶談

場侍郎周卜世前總督浙閩兵部侍郎劉兆麒俱改都督同知僉事等銜充山西山東直隸等處援勦提督總兵官

五學士

國朝官制設內三院曰國史曰秘書曰弘文院各有學士一員既設翰林院以內三院為內閣則止設閣學二員而別以一人掌翰林院事俱兼禮侍康熙十九年庚申乃有學士五人內閣徐立齋元李容齋馥掌院葉訥菴方而張敦復英以講學內直隸翰林院學士李厚菴光以軍功超擢學士至是入京 陛見奉 特旨入內閣四公皆兼侍郎葉則加尚書云○近李諫臣應王藻儒揆李倚江枏顧懿樸同時為內閣學士亦四人李去陸義山棻代之王羅戶侍徐勝力嘉代之陸乞休韓基廬炎代之亦四人

李選侍

明光宗朝選侍李氏鼎革後尚存至康熙甲寅歲五月十八日始卒

會議

翰林記正統十年始命內閣與六部都察院通政司大理寺堂上官六科掌印官會議遂為例如合會儒臣則本院詹事府左右春坊司經局國子監皆與 國朝制凡大事及章奏會議內則親王貝勒大臣外則九卿詹事科道而內閣翰林院不與詹事府凡事皆得與坊局不與

不避廟諱

唐避太宗御諱率改世曰代子讀皮襲美文藝多不諱世字鹿門

隱書一條云三王之世民知生而不知化五帝之世民知化而不知德又與元徵君書云懼來世聖人責乎無意于民又皆世民二字連用

讀講諭洗

康熙中更定品級考後又定朝班坐次侍讀侍講班在諭德洗馬之上然凡郊廟祭祀諭洗皆與陪從而讀講則否及推陞祭酒則庶子與讀講皆得開列而諭洗則否又左右掌坊庶子正五品侍讀侍講學士從五品而庶子必陞講學皆品級考之宜加審詳者

張真人

隆慶中江西守臣言張氏職名賜印不載典制宜永裁草認草去真人之號以為上清觀提點萬曆初復之相沿至今無釐正者使

與衍聖公之然並列何哉

有子

萬曆初訓導侯貴上言論語成于有子曾子之門人子張不及有若進子張而坐有子于庶非是予嘗謂十哲未允當進有子而默宰我冉有貴之言誠不易之論及余為祭酒已具疏欲言之同人謂恐涉紛更而止至今以為憾

明太宗稱祖

宋孝宗淳熙十五年太上皇崩洪邁請廟號世祖尤袤言光武以長沙王後布衣崛起不與哀平相繼稱祖無嫌太上繼徽宗正統以子繼父非光武比乃定號高宗明嘉靖十七年加上太宗廟號曰成祖豈未聞衰之言耶



翰詹官朝班

翰林記載翰林院朝房在午門外右第六區殿閣大學士本院學士以下皆在馬詹事府在右第十八區詹事少詹事以下皆在馬今制內閣大學士本院學士詹事少詹事皆拜于殿上不與部院同班

起居注

康熙十年復設起居注館在午門內之西與實錄館相對其官則自掌院學士詹事以下史官以上皆得充之初止八人後增至十六人今桐城張公英以禮書兼掌院事亦為起居注官吏侍常書公兼掌院事亦然

序秩

翰林記凡修書考試等事書職名學士序于春坊大學士庶子之上讀講學士序于諭德之上侍讀侍講序于府丞中允之上修撰序于贊善司直之上今春坊大學士府丞司直罷不設大抵學士在詹事之上學士兼禮部侍郎為三品詹事本三品而兼侍讀學士少詹事在讀講學士祭酒之上庶子在侍讀侍講之上讀講在諭德洗馬之上中允贊善司業次之史官又次之庶吉士又次之陞遷則同較俸次

批旨

翰林記宣宗時始令內閣楊士奇等及尚書兼詹事夏原吉蹇義凡中外章奏用小票墨書貼各疏面以進謂之條旨中易紅書批出今謂之票旨尚沿其制而批紅則內閣學士之職

國初明史總裁

國初順治二年曾奉旨纂修明史大學士剛林祁克格范文程
馮銓洪承疇李建泰為總裁學士詹圖賴衮伊圖寧完我蔣赫德
劉清泰李若琳胡世安侍讀學士高爾儼侍讀陳具慶朱之俊為
副總裁郎廷佐等九員為纂修官

薦舉優異

康熙戊午薦舉文學洪洞進士范鄔鼎以病辭廼撫疏奏 溫旨
令遵前諭來京以副求賢至意此諸人至京又 諭戶部月給銀
米其不與五十人之選擇高年者授以官部議皆授司經局正字
特 旨改內閣中書舍人初太原傅山定興杜越年皆七八十以
老病請于吏部不與 御試故部議不及特 旨傅山杜越等文
行素著俱着授內閣中書右文之盛古未有也

四布衣

上嘗問內閣及內直諸臣以布衣四人名字即富平李因篤慈谿
姜宸英無錫嚴繩孫秀水朱彝尊也後公卿薦舉獨宸英不得與
繩孫目疾是日應制僅為八韻詩閣中閱卷已不錄 上特令與
因篤彝尊二人同授翰林是時宸英方在京師不免向隅信遇合
有定命也閣卷四人大學士高陽李公寶坻杜公臨朐馮公掌院
學士崑山葉公

考察

翰林記載翰林官考察之法成化間本院學士會同內閣考察弘
治元年令翰林官亦從吏部考察 本朝翰林京察在吏部過堂
例凡數變順治中讀誦論洗中贊司業以上皆後堂相見具迎送

之禮康熙癸丑始在前堂過半堂呼官及姓不呼名至己未則自
少詹讀講學士直呼名矣京堂官自僉都御史大理少卿左右通
政亦皆呼名體統凌替非古制也

賜居第

翰林記洪武中賜編修羅復仁居第宣德中賜楊溥第于東安門
康熙丁巳上命左諭德兼修撰張英內直講書特賜第西華門
內翰林院侍講高士奇亦然後杜編修訥亦賜第厚載門

明史

康熙十七年內閣奉 上諭求海內博學宏詞之儒以備顧問著
作時閣部以下內外薦舉者一百八十六人十八年三月朔 御
試禮仁閣下 璿璣玉衡賦省 中選者彭孫適等五十人有 行

以翰林用開局編修明史候補少卿一人邵吳遠改侍讀監司湯
斌李來泰施閏章三人郎中吳元龍一人改侍講進士彭孫適中
書舍人袁佑等授編修貢舉監生員布衣倪榮等授檢討以原
任翰林院掌院學士徐元文為監修官翰林院掌院學士葉方藹
右春坊庶子兼侍講張玉書為總裁官開局內東華門外

五十相

石林燕語云本朝宰相自建隆元年至嘉祐四年一百四十年凡
五十人明崇禎十七年間命相亦五十人可以觀治亂矣

陳澹從祀

康熙二十六年江西巡撫安世鼎疏言宋儒陳澹南康府都昌縣
人著禮記集說學者宗之當與程朱蔡沈胡安國並議從祀部覆

陳澧禮經集說上有師承源流明白但性情精深之處未能遽逮程朱即較之蔡沈胡安國亦覺有間且生平行實湮沒無考既已專記于鄉其著書立言之功亦足云報崇奉兩廡未敢輕議

內大臣

本朝官制滿洲勳舊別有內大臣不為閣部院官及八旗都統等官有軍國重事在禁中與滿洲大學士尚書等雜議謂之黑白昂邦按唐制兩樞密使左右中尉稱內大臣然彼乃中貴寔異而名同耳

奪情

奪情非盛德事唐宋名相多蹈之賢如曲江公亦所不免明新都楊文忠公屢疏力辭起復升菴謂國朝宰相不起復自公始前也三楊蹇夏諸名臣奪情者習為故常不知何以李文達獨受惡名明末武陵奪情則有軍旅之事較之無事之時自可未減湘潭王山長岱常著說雪武陵之寃亦自有理然漳浦之論固萬古不易也

從祀疏

康熙二十年都察院僉都御史張吉午疏言故明翰林院學士方孝孺當建文靖難之際平居則闡道黜邪臨難則成仁取義能以理學為天下倡其所著遜志齋集自程朱而後未多見也吏部尚書羅欽順當正嘉之際學者蔑棄淵源談空好異欽順作困知記以正人心斥雜學似是之非明心性毫釐之辨至萬曆啓禎間聖道式微異端益熾賴有光祿少卿顧憲成都察院左都御史高攀

龍倡正學于東林都察院副都御史馮從吾倡正學于閩右都察院左都御史劉宗周倡正學于浙東皆能羽翼聖經發揮賢傳有功于理學名教並當急議從祀以光大典但此六臣或阻于忌諱或扼于權奸所以故明未及表章實為勝國之闕余正在纂修明史之時伏乞 覃恩從祀登之學宮兩廡使天下知正學云云

常參

文昌雜錄載宋時百官日赴大德殿東西向對立宰相一員押班再拜退謂之常朝又云唐制京司職事官有朔望參有五印參唯職事官五品並供奉官八品以上及員外郎監察御史太常博士則每旦參有常參官九參六參官等云云春明退朝錄唐有職事者謂之常參今隸外朝不釐務者謂之常參本朝順治中月日朝世祖皇帝嫌其頻數定以三旬逢五日常朝壬戌夏有旨文武官每日五更入朝列班午門外候部院咨奏官出始散歸署既而大理寺司務趙時揖上疏言之尋有旨九卿詹事掌印給事中掌道御史如故餘并停趙杭州人

琉球入學

康熙二十三年冊封琉球翰林院檢討汪楫中書舍人林麟焟等疏言中山王尚貞親詣館舍云下國僻處彈丸常慚鄙陋執經無地嚮學有心稽明洪武永樂年間常遣本國生徒入國子監讀書今願令陪臣子弟四人赴京受業云云事下禮部覆史載唐貞觀中興學校新羅百濟俱遣子入學琉球自明初始內附會典載大琉球國朝貢不時王子及陪臣之子皆入太學讀書禮待甚厚

又載洪武永樂宣德成化間琉球官生俱入監讀書今談國王尚
貞以本國遠被 皇仁傾心嚮學懇祈使臣汪楫等轉奏願令陪
臣子弟四人赴京受業應准祈請聽其遣陪臣子弟入監讀書

大臣官銜

自康熙元年以後閣部大臣無加官銜者壬戌十一月以 太宗
文皇帝實錄告成加武英殿大學士禮部尚書勒公明公俱太子
太傅少傅保和殿大學士戶部尚書高陽李公太子太師致仕太
子太傅保和殿大學士禮部尚書寶坻杜公太子太師致仕文華
殿大學士刑部尚書臨朐馮公太子太傅故太子太傅中和殿大
學士吏部尚書都統公圖公追贈少保仍兼太子太傅二十餘年
所未有也

土魯番表

康熙二十一年土魯番上言伏以我 皇上猶昔者斯堪達爾之
君一統金甌扎穆西特之君藻鑑五 亦若化日普臨率土景星
光照萬靈抑猶哈地穆之君廣 恩惠汝思他穆之君勇力絕倫
譬之矛鋒之銳龍爪之威莫敢正向而視茲者恭候 聖安切照
前經遣發進貢烏盧火者曾 上諭五年一次進貢欽此所以悞
此進貢者原因臣國遭逢荒亂今幸太平亟遣亦思喇木火者前
往進貢至於以後應進貢物合當照密爾焦地音阿克刺覃進貢
舊例但天朝建都極東臣國地居極西應否照舊進貢表請裁奪
蒙古表

康熙二十一年蒙古為請 旨事外藩蒙古王貝勒貝子公台吉

等諸臣誠惶誠恐謹奏者向因逆賊吳三桂相率叛亂軍民極其荼毒幸我皇上不憚身心之勞致圖治仰見天朝早臻太平是以祭告太祖皇帝太宗皇帝世祖皇帝復上太皇太后皇太后徽號渙頒恩詔大赦天下爰加賜賚率土俱歡恭上我皇帝尊號為至神大德治平天下聖皇帝伏祈皇上俯准臣等所奏臣等不勝欣躍奉旨朕自御極以來夙夜孜孜勤求化理期于中外又安生民樂業今逆寇雖已蕩平治化尚未孚洽前諸王大臣等請上尊號已經有旨這藩王等所請亦不必行談部知道

謄卷

唐閔際美鋪試蜡日祈天宗賦誤書衛賜作衛駟榜出登第往參座主曰諸君試日天寒急景寫札或不如法恐文書到西京須呈宰相請先輩各買好紙重來請印如法寫淨送納抽其退本舊時直省小試解卷送禮部例須別謄淨本亦是唐人遺意至鄉試朱墨原卷解部即不得爾

綠頭牌

國朝六曹章奏悉沿明制惟緊急事或涉瑣細者則削木牌而綠其首以滿洲字書節略于上不特入奏取旨不下內閣票擬謂之綠頭牌子蓋古方策遺意也

官年

三十年來士大夫履歷例減年歲甚或減至十餘年即同人宴會亦無以真年告人者可謂薄俗按洪容齋四筆宋時有真年官年

之說至形于制書乃知此風由來遠矣獨寇萊公不肯成年應舉
又司馬朗傳伯達志不成年以求成則漢魏間已有之

柳條邊

哈達城在撫順東北有哈達河其東插柳結繩以界蒙古長亘千
里南至朝鮮西至山海關有私越者置重典名柳條邊見高宮詹
士扈從東廵日記

特賜謚

本朝最重易名之典官至尚書大學士乃得 賜謚近惟翰林院
掌院學士喇沙里公以講筵舊勞人勤王事以死 特贈禮部尚
書謚文敏掌院學士葉公方藹以講筵舊勞 特加禮部尚書尋
遷刑部侍郎仍帶掌院學士加禮書舊勞亦謚文敏掌院學士

沈公荃亦以講筵舊勞加禮部侍郎仍掌府事卒謚文恪皆異數
非常例也

謚典

古易名之典太常博士議之吏部考功奏行之有未允者所司駁
之其重如此明掌于禮部 本朝則內閣典籍司之每一人擬八
謚或六謚以上內閣臣擇其三四進呈 御覽欽定其一

題名碑

劉公嘉話錄慈恩寺題名起于進士張莒題姓名于雁塔下後書
之于版遂為故事宋龐文英文昌雜錄云本朝進士題名皆刻石
于相國寺興國寺趙昇朝野類要云進士及第各集鄉人于佛寺
作題名鄉會起于唐之慈恩寺墻也予按進士題名列諸梵剎于

義無取至明乃立題名碑于國學題名記或學士或祭酒撰其典始重永樂壬辰已前在南雍今京師太學持敬門內諸碑題自永樂十四年丙申科始至崇禎十六年癸未科止塙首龜趺星羅林立一代之鉅觀也 本朝最為右文而題名碑止順治丙戌一科丁亥已後無之當時不知何故廢而不舉後遂相沿此闕典也

土地

今吏部禮部翰林院衙門土地祠皆祀韓文公明南京吏部土地祠則祀蹇忠定公

太學題名碑

予前記本朝國學進士題名碑未立為闕典官祭酒時欲疏請未果丁卯御史言之禮部覆疏允行按水東日記云內官阮安督工建太學時悉取前元進士碑磨去刻字今三年一立石皆是物也此雖與五代時劉剽守長安取古碑甃城事微不同然古蹟湮沒亦可惜也

七品銜

宋制見任官得應制科文官許二次武官一次謂之鎖廳 國朝惟內閣中書舍人貢監出身者許應鄉試舉人出身者許應會試他即無之近江寧黃虞稷慈谿姜宸英以諸生薦入館修史特加七品服俸 覃恩得以其品馳封父母而寔未受官也

閣學

明殿閣詞林記有殿學閣學詹學翰學之名 國朝閣臣大拜祇稱中堂或稱相公而內閣學士則稱閣學按葉石林避暑錄云宣

和未陳亨伯以捕方賊功進龍圖閣直學士稱能學顯漢徽猷二
閣直學士欲效之而難于稱謨學猷學乃易為閣學此稱閣學之
始

廣文

唐宋以來仕官多乞鄉郡以便養猶有古意明代始不得官本籍
至廣文寒官亦有越在萬里者 本朝廣文皆銓本直省但不仕
本郡耳

八股

康熙二年以八股制藝始于宋王安石 詔廢不用科舉改三場
為二場首場策五道二場四書五經各一論一首表一道判語五
條越甲辰會試迄丁未會試皆然會左都御史王公熙疏請酌復

舊章予時為儀制員外郎乃條上應復者八事復三場舊制其一
也尚書錢塘黃公機善之而不能悉行乃止請復三場及寬民間
女子裹足之禁教官會試五次不中者仍准會試三事皆得 俞
旨餘五事後為臺省次第條奏以漸皆復如寬科場處分條例復
恩拔歲貢復生童科歲兩考等是也

督捕

督捕衙門始兵部兼攝之順治甲午尚書王公永吉奏增設兵部督
捕衙門滿漢左右侍郎各一員滿漢司官各六員後以太僕寺少
卿協理旋改左右理事官秩四品視常僕少卿壽光魏昭華 瑄以
大理寺卿首遷督捕侍郎後以建言徙塞外卒至康熙三十八年
復裁事歸刑部

考選

黃訓讀書一得云羅豫章文質公撰尊堯錄稱宋仁宗明道中宰相欲除二親故為正言司諫帝謂祖宗法度臺諫官須宸選若自大臣除則大臣過失誰敢言者仁宗此言可以為萬世法

結銜

輟畊錄云中書右丞相伯顏所署官銜計二百四十二字明天啓中魏闖擅權倣縉紳為內官便覽首列已銜亦至二百許案古來權奸如出一轍勺中志略云天啓中凡司禮監題本年月之下上層排臣王體乾臣魏忠賢下層排梁棟李永貞石元雅冷文輔諸人及列內臣便覽體乾復讓忠賢居首特高一字

漢軍漢人

本朝制以八旗遼東人號為漢軍以直省人為漢人元時則以契丹高麗女直竹因歹竹亦歹木里闊歹竹溫勃海八種為漢人以中國為南人

義王

孫可望與李定國皆張獻忠義子冒張姓號東府西府後獻忠敗死俱走入滇二人以爭權積不相能可望戰敗乃降世祖皇帝方以文德柔遠封可望義王世襲賜第東長安門外可望死其子徵灝襲封康熙十二年臺省以為言下諸王大臣九卿會議降封義公改慕義公蜀綿州鹿頭關龐士元祠可望重修有石坊大書偽銜柱國太師兵部尚書凡數百字猶稱張可望云

義字謚

明大學士高公穀謚文義二百七十年謚義者止此一人本朝順治初大學士德州謝公陞卒謚清義

閣謚

本朝謚法閣臣不由翰林皆得謚文如洪公承謚文襄宋公權謚文康王公未金公之皆謚文通孫公廷謚文定衛公周謚文清李公之謚文襄皆非翰林也

臣下私諱

晉咸和三年拜王舒為撫軍將軍會稽內史舒疏父名會乞換他郡朝廷乃改會作鄒宣城有夷水以桓温父名彞改變水後唐同光三年以郭崇韜父名弘改弘文館為崇文館長興四年以馬贊父名不欲斥其家諱改同平章事為同中書門下三品南唐元

宗以董思安為漳州刺史思安辭以父名章特命改名南州又後主嗣位以鍾皇后父名太章尊后為聖尊后于禮君所無私諱為臣下諱失禮意矣

宋官制

宋初至元豐以前官制最為繁猥六部九寺皆為空官特以寄祿秩序班位而別以他官判職事如兵部事歸樞密院戶部工部歸三司設審官院三班院流內銓判吏部之事設判禮部判貢院判禮部之事設判審刑院及詳議官判刑部之事又有使有權使有權發遣使之名他如太常歸判司禮院太僕歸群牧司鴻臚歸客省之類官自官職自職名寔舛互范文正公在政府奏言今六尚書九卿之職皆權知權判無一正官并是權假教易無定莫安其

職如欲復三公九卿六尚書之任則體大難舉願且命內地輔臣兼領綱要仿周官三公下兼六卿如召公領冢宰芮伯領司徒畢公領司馬遺意又雜引漢制三公分部九卿唐太宗時宰相兼職掌以為證又條列審官流內銓三司農寺群牧司國子監太常禮院三班院殿前馬步軍司審刑部大理寺刑部等職事并令兩府兼判云然以宰執分判六卿九寺更為侵官至元豐新制行六部置尚書侍郎而各以郎官屬焉九寺各置卿少卿及丞簿之屬為寺監官國子監置祭酒司業及丞簿之屬為學官又有御史臺有兩省通謂職事官以唐文散階換部寺省監官歸釐本職如以金紫光祿大夫易吏部尚書銀青光祿大夫易五部尚書正議大夫易列曹侍郎之類通謂階官而食其俸即明制所本也但明

制以六部合都察院通政司大理寺謂之九卿與樞事府俱得會議大政而太常太僕以下為小九卿本朝官制率沿明舊特于六部外設督捕錄兵部置滿漢侍郎各一員理藩院尚書一員侍郎二員又設宗人府正令以覺羅為之府丞一員以漢人或漢軍為之秩在副都御史下通政使大理卿上又設啓心郎二員以烏金超哈為之後即古之宗正也順治十六年裁去尚寶寺迄今未置震澤長語云宋制所謂官乃古之爵也所謂差遣乃古之官也所謂職乃古之加官也

國朝官制

國初內三院滿洲大學士謂之榜式烏金超哈官大學士亦稱榜式如范文肅公竊文毅公是也六部初不置尚書率以貝勒管部事置侍郎以佐之有滿洲漢軍即烏金超哈漢人各二員後置尚書久

克令池非偶談

卷

之又省去漢軍侍郎定為滿漢尚書各一員侍郎各二員漢軍亦有為漢侍郎者滿洲郎中員外郎初稱理事官副理事官後乃改從漢官之稱惟協理兵部督捕太僕寺漢少卿二員改稱理事官科道初亦稱理事後改同漢人俱稱給事中御史云

宋祠祿

宋士大夫多領宮觀食其祠祿予嘗以問葉讀學訊菴方葉云宋置宮觀罷官者領之俾食其祿亦宋朝忠厚之一端也余考之不然神宗熙寧二年王安石為參知政事創制置三司條例司始行青苗均輸等法出呂誨范純仁錢公輔鄭獬等在外罷富韓公弼平章事是年始增置宮觀官丘文莊公世奭正綱云王安石行新法而欲去異議者彼皆先朝舊臣素有聞望一旦去之無名乃為祠祿處之不知所為宮觀者所業何道為之使者所治何事而一時士大夫甘心受其豢養何耶此蓋安石增置之法非祖宗故事然終宋之世不改亦不典甚矣

大學士兼尚書

國朝入閣皆仍兼尚書銜惟康熙初益都孫文定公柏鄉魏公前後俱以吏部尚書大拜而不兼尚書其後復改內三院為內閣魏公得兼禮部尚書文定則告歸久矣

學士大拜

本朝以學士大拜者二人高陽李公丙戌進士戊戌大拜兼工部尚書孝感熊公戊戌進士乙卯大拜兼刑部尚書李年三十四熊年四十一

讀卷

今內閣九卿讀卷但擬十卷呈 御覽各以首卷進呈候 旨命讀則讀不命則否水東日記載景泰辛未廷試日陳閣老得三卷向南房紙窗圈點云：則是明制讀卷官亦著丹黃今無此制矣入九卿但論衙門不論官之崇卑如己未魏雙鳳以督捕理事官壬戌科張鵬以通政司叅議皆得讀卷而宗人府丞太常寺卿等三品例不與翰林講讀學士多為收掌官于事體殊未當也

國書之制

本朝文移書疏之制 國書則自後而前漢書則自前而後凡宮城榜書率用清漢蒙古三體按草木子載元朝行移文字漢字自前而後蒙古字自後而前畏吾兒字則橫書之

試卷稱名

宋呂申公試卷中自稱名王柏題其後謂古意尚存盛如梓云淳化中立糊名之法祥符中立謄錄之制則又在申公之前矣

伐木

江南造戰艦下令郡縣伐木洞庭民家孀姬止一女縣吏至其家伐木復令其舟送木至郡既至郡候縣府道院查驗動淹旬月姬計無所出乃粥女以償諸費施彥執爨輟錄載宋劄都錢唐需林木甚大所在鼎沸鄧光祖知嚴州殊不經意徐集各里正以朝廷所降木色丈尺人予一紙令各具界中寺廟館驛官道木與所降色樣合者供之既供令匠往視皆合令里正自伐官特予糧須吏木大集民間毫無所苦康熙二十一年以太和殿大工凡楚蜀

閩粵產木之地皆差部員往採明旨嚴禁騷擾姚給事濮陽項
疏請禁伐祠廟冢墓間樹得旨允行仁人之言其利溥哉

乘肩輿

本朝順治初漢人京官亦多乘馬予壬辰計偕入京師見高郵王
文通公每入朝皆乘馬其後始易肩輿三品以上用四人肩輿四
品以下則二人耳然旗下大官例乘馬無肩輿有之自近年始宋
朝野類要云百司出局人從先報上馬者蓋舊禮只是乘騎自中
興以來始得乘肩輿也建炎朝野雜記云東都舊制耆德大臣或
宗室屬近行尊者特旨許乘肩輿建炎初上以維揚叛滑謂大臣
曰君臣一體朕不忍使群臣奔走危地可特許乘轎塵史謂唐時
宰相乘馬五代始用轎子本朝近年惟文潞公以太師平章軍國

重事司馬溫公始為門下侍郎尋卧疾就拜左相不可以騎二公
並許乘檐子皆異恩也外官有輿不用惟蓋古寨惟之意今惟
江寧開封督撫司道府廳縣官皆用煖轎蓋沿宋明都城之制至
今未改耳

宮衛

康熙元年已後大臣無加宮衛者惟閣臣高陽寶坻臨朐三公以
世祖皇帝實錄成晉宮衛其後宛平漢陽長洲三公以太祖寔
錄聖訓告成亦晉宮衛甲子四月刑侍南宮宋公文運以老病乞休
上嘉其慮慎特加太子少保致仕丁卯四月巡撫直隸僉都御史
于公龍成亦加太子少保皆異數也

安南始末

安南入 本朝順治初莫敬耀來歸未受爵而卒後其子元清為都統使居高平黎維禔亦來歸未受封而卒康熙三年遣編修吳光禮部司務朱志遠 諭祭維禔五年遣侍讀學士程芳朝禮部郎中張易賁 冊封其子維禧為安南國王六年維禧奪元清高平地遣侍讀李仙根兵部主事楊兆傑諭還之粵西孫廷齡馬雄叛元清負恩助逆病死其弟敬光為黎氏所討來奔令地方官送歸本國死于泗城土府爵除維禧死弟維禔嗣維禔死弟維禎嗣康熙二十二年遣侍讀明圖編修孫卓冊封維禎為安南國王仍賜御筆扁額忠孝守邦四大字又遣侍讀郭黑禮部郎中周燦諭祭兩故王維禧維禔二禮並舉稱盛事云

親謁孝陵

康熙甲子冬 大駕幸金陵親謁明太祖孝陵 上由甬道旁行諭扈從諸臣皆于門外下馬 上行三跪九叩頭禮詣寶城前行三獻禮出復由甬道旁行賞賚守陵內監及陵戶人等有差 諭禁樵采令督撫地方官嚴加巡察父老從者數萬人皆感泣總督兩江兵部侍郎王新命刻石紀事已巳春南巡再 謁孝陵古今未有之盛舉也

朝報

今之朝報或曰邸報亦有所本見王明清揮塵錄趙昇朝野類要云朝報日生事宜也每日門下後省編定請給事判報方行下部進奏院報行天下其有所謂內探省探衙探之類皆衷私小報率有漏洩之禁故隱而號之曰新聞蓋自宋時已然又六科 綸音

說鈴 池北偶談

元

冊子號晚帖以當晚即知之次日乃登邸報故曰晚帖亦有小報謂之小抄

東野氏世襲

康熙二十三年 上東巡周公後裔七十三代孫世襲奉祀生員東野沛然上疏願恩奉 旨交與該部禮部覆無庸議奉 旨周公承接道統繼往開來功德昭著其子孫應給職銜着九鄉詹事科道會同確議會議得周公後裔應授官職撥給祀田修葺廟宇行文該撫查明以沛然世襲五經博士如孔顏曾孟仲氏例先是沛然上疏行在 上召問周公姬姓爾疏稱東野何故沛然對曰昔魯公伯禽季子魚賜東野田一成因以為氏上曰周公廟廷何在對曰在闕里城東北二里 上悅隨 御製祭文遣 恭親王

致祭禮部尚書介山 御前侍衛觀保鴻臚寺卿穆成格閣典邦太常寺丞張量馨山東提學道副使唐賡堯陪祭其後沛然卒子枝盛嗣為博士云是時子貢後裔端木謙端木直亦上疏請部議不允

階官避家諱

余嘗疑六朝以來朝廷為臣下避家諱至改州郡名者有之考魏鄭錄乃知宋時律文有私諱冒禁徒一年之禁四銓之法遇磨勘階官之稱與其三代諱相值者許其自陳授以次官謂之寄理遂以繫之官稱之首人李文簡燾奏疏亦載雍熙二年有詔凡除官內有家諱者三省御史臺五品文班四品以上許用式奏改餘不許嘉祐六年翰林學士賈黯知審官院奏准下太常禮院大理寺

同議言祖父之名子孫所不忍道不繫官品之高下并當迴避乃
詔凡府號官稱犯祖父名而非嫌名及二名者並聽迴避其後韓
絳除樞密副使自言樞字與祖名下一字同乞避免不許遵嘉祐
之詔也宋敏求提舉萬壽觀敏求父名敏自言壽字犯父嫌名詔
改醴泉觀則嘉祐之詔復不行矣及吳中復提舉荆湖北路兵馬
中復父名舉乞改稱提轄詔以朝廷官稱不當避守臣私諱遂不
許然後知迴避私諱唐宋以前載在律文亦孝治天下之意明代
以來始刊削耳又燾疏引晉江統言其叔父春為宜春令與縣同
名故事職與祖父名同皆得改選而未有身與官職同名改選之
例統以為身名所加亦施于臣子凡佐史朝夕必稱厥官倘指實
而語則觸尊者諱或詭詞迴避則以私廢公統以為身名與官職
同者宜與祖父名為比武帝許之據此又不獨迴避先諱矣朝野
類要云授職任而犯三代名諱者許避之而開禧初張嗣石除起
居郎以犯諱辭免改名修注官其餘若一名偏犯則不避

武職丁憂

武職舊無丁憂之例康熙二十四年四川提督何傳疏言竊惟議
禮制度聖王御世之大權地義天經人子立身之大本養生莫如
送死教孝所以作忠據夔州副將孫斌呈詳云：通喪制禮既無
貴與賤之殊沿例宅憂乃有文與武之別俱屬毛而離裏忍絕裾
以滅親豺獮尚有一祭之知介冑豈無三年之愛臣以失怙恃見
素鞞而興懷恭際分明瀝丹心而上請寔天下萬世之公義非孫
斌一人之私情伏懇特渙 綸音定武職三年通喪之例垂光史

册云之得 俞旨遂為定制孝治之道夙絕千古矣
又浙江提督陳世凱上言武臣丁憂特其一節宜令讀書識忠孝
大義得 溫旨已後武臣俱當留心典籍責令提鎮倡率之

訪遺書

康熙二十五年四月 上諭禮部翰林院自古帝王致治隆文典
籍具備猶必博採遺書用充秘府以廣見聞而資掌故其盛事也
朕留心藝文晨夕披覽雖內府書籍篇目粗陳而裒集未備因思
通邑大都應有藏編野乘名山豈無善本宜廣為訪輯凡經史子
集除尋常刻本其有藏書秘錄作何紛值採集及借本抄寫事宜
爾部院會同詳議具奏務令搜羅罔佚以副朕稽古崇文之至意
旋又奉 旨關係經史方許採進時禮侍徐乾學疏進宋朱震漢

上易傳并圖說十五卷宋張浚紫巖易傳九卷讀易雜說一卷魏
了翁大易集義六十四卷曾種大易粹言十卷呂祖謙東萊書說
十卷元金履祥尚書表注十二卷宋李樗黃樵毛詩集解三十六
卷趙鵬飛春秋經筌十六卷王與之周禮訂義八十卷蔡節論語
集說十卷李燾續資治通鑑長編一百六十八卷唐開元禮一百
五十卷共十二部

御書

康熙二十三年 駕幸闕里 御書萬世師表四字懸大成殿次
年以四字頒行天下學宮又 御書白鹿書院額廬山白鹿洞并
賜監本五經四書其河南府二程祠邵康節祠鳳翔府橫渠書院
建寧府紫陽書院徽州府文公闕里長沙府石鼓書院皆頒 御

書學達性天大字古今罕觀之盛舉也

毀淫祠

康熙丙寅擢江寧巡撫都御史湯斌禮部尚書掌詹事府事湯瀕行疏毀吳下淫祠五通五顯劉猛將五方賢聖等廟恭請上諭勒石上方山得俞旨通行直省初湯以閣學遷巡撫過予邸舍予為言吳中婦女好入寺院燒香首當禁止湯以為然在吳遂力行之風俗一變若淫祠一節尤于世道人心裨益不小湯自言昔為方面時只遵寧陵呂叔簡先生從政錄行之其撫吳亦此志云

戊巳二官名

漢元帝初元三年置戊巳校尉屯田車師前王庭班書師古注自甲至癸皆有正位唯戊巳寄治今所置無常居故取戊巳為名或云戊巳居中鎮覆四方今所置校尉亦處西域之中撫諸國也然戊巳自是兩宮後漢耿恭為戊校尉閔寵為巳校尉是也

起復

趙昇朝野類要云巳解官持服而朝廷特再推用者名起復起復即奪情也今人以禫後即吉為起復者誤

試官

今諸司官初選即定授唯監察御史中書舍人必先授試職一年滿內閣都察院方題實授沿明舊例也按明初范敏試吏部尚書李冕試禮部尚書徐恢試戶部尚書茹常試兵部尚書開濟試刑部尚書楊靖王暹試侍郎詹徽茹太素試都御史又有試給事中至正德中陸完為試都御史此例今人不知

八旗開科

八旗鄉會試開科始于順治辛卯壬辰至丁酉停止康熙己酉庚戌復舉行至丙辰停止丁卯夏五月以亢旱肆赦再復開科之例
○按開科之例前後稍有不同順治壬辰乙未滿洲蒙古用滿文另為一榜壬辰狀元麻勒吉兩江總督乙未狀元圖爾宸工部侍郎庚戌癸丑滿洲蒙古槩用漢文即附漢人通為一榜辛未甲戌復開科例仍之

徵聘不至

康熙己未博學宏詞之徵內外薦剡百八十餘人不至者四人浙江應為謙嗣寅江西魏禧水叔山西范鄆鼎彪西陝西李顯中孚范登順治辛丑進士闡明絳州辛復元全先生之學與應李以理學著于南北唯魏以古文擅名其兄際瑞弟禮皆有詩名時號寧

都三魏

祭北海

丁卯四月副都御史徐元珙疏請釐正祀典其略云臣按歷代祀典唐望祀北海于洛州即今河南府也宋望祀北海于孟州即今懷慶府也明亦望祭于懷慶府我朝典制東海祀于萊州南海祀于廣州二祀近海誠為允當西海則于蒲州望祭蓋西海遙遠循宋明之舊而望祭之宜也至北海則仍祭于懷慶夫宋都于汴而懷慶在其北彼時幽燕皆非宋土即出國門而望北一祭亦權宜之計有明定鼎燕京仍往南而祭北海我朝因之殆非宅中以蒞四海之義伏查北鎮醫無閭山在奉天府屬今為北鎮山海關迤北之海非北海乎况盛京發祥重地土厚水深源流綿邈

皇上聲教四訖幅員之大亘古未有長白山水并烏龍鴨綠諸江亦盡朝宗于海則北海之祭不應仍在懷慶此祀典之急宜釐正者伏查順治十七年科臣粘本盛題請改祭北岳于渾源州祈下部議嗣後告祭更定于迤北近海地界云云得旨下九卿詹事科道會議上言明臣丘濬言京師東北乃古碣石滄海之地于此立祠就海而祭為宜濬所云碣石今在永平府但我朝幅員廣大混同江水發源長白流入北海今北海之祭應改混同江邊望祭可也得旨允行

周張後裔

康熙二十四年僉都御史姚締虞言宋儒周惇頤有開紹之功下部議得旨以惇頤二十九代孫嘉耀世襲五經博士二十六年

戶科給事中汪晉徵言孔孟以來道學之統至宋周程張朱而始著乃程朱二氏久置世襲博士周惇頤子孫亦為博士其張載子孫應一體卹錄云々九卿等覆議順治十二年八月據江南布政使司呈請朱熹裔孫煌禮部題授世襲五經博士康熙九年五月禮部覆御史傅世舟疏題授二程裔孫程宗昌程延祀世襲五經博士二十四年四月九卿詹事科道會議僉都御史姚締虞疏題授周惇頤裔孫嘉耀世襲五經博士張載關中大儒與濂洛並重載裔孫亦應照例授世襲五經博士陝西巡撫副都御史布哈疏請以載裔孫張夢熊應詔夢熊未及襲而卒以其子從先為博士

臺灣開科

康熙丁卯夏四月福建提督張雲翼疏請臺灣鄉試宜照甘肅寧

夏例于闕場另編字號額中一二名禮部覆准臺灣新經歸附文教初開應將臺灣一府三縣生員照甘肅寧夏之例另編字號額外取中舉人一名得旨允行是科五十一名蘇峩鳳山縣附學生習易經

滿洲鄉試

丁卯夏 恩詔八旗滿洲蒙古漢軍原有定例同漢人一體開科取士前因用兵暫行停止今仍照舊舉行禮部題請于直隸舉人額外滿洲蒙古取中舉人十名另編滿字號漢軍取中舉人五名另編合字號漢軍稱烏金超哈故也會試亦于漢進士額外滿洲蒙古取中四名漢軍取中二名皆與漢人一體作文考試 盛京生員附入在京八旗本年鄉試期迫俟庚午辛未科舉行云

千秋康氏

本朝順治已來直省民間一產三男者歲有數十多不勝紀定例官給米三石布十疋而已按南唐時金陵人康國輔娶司馬氏一產三男唐主以為瑞皆封將軍號千秋康氏柳子厚集有為廣南鄭尚書奏百姓一產三男狀侈為休徵想爾時此事絕少故以為祥瑞而優異如此

暹羅表

康熙二十三年暹羅國進表云啓奏 大清國 皇帝陛下伏以 聖明垂統繼天立極無為而治德教孚施萬國不動而化風雅澤及諸彝巍上莫則蕩上難名卑國世荷 皇恩久沾德化微臣繼襲踐祚身屬遐方莫能仰瞻 天顏幸遇貢期敢効輸款頌遣正

說於池北偶談

貢使坤字述列瓦提二貢使臣坤巴寔提瓦抒三貢使臣坤司吝塔瓦渣正通事坤思吝塔披彩辦事文披述塔新禮嘑等梯航渡海齋捧金葉表文方物譯書前至廣省差官伴送京師朝貢進獻代伸拜舞之誠恪盡臣子之職恭祝 皇圖鞏固 帝壽遐昌伏冀俯垂鑒納庶存懷遠之義微臣瞻天仰聖不勝屏營之至

裙帶官

宋時親王南班之婿號曰西官又謂之裙帶官見朝野類要

長白山

內大臣覺羅武等謹題為遵 旨看驗長白山事康熙十六年四月十五日內大臣覺羅武 一等待衛兼親隨侍衛首領臣耀色 一等待衛臣塞護禮三等待衛臣索 奉 上諭長白山係 本

朝祖宗發祥之地今乃無確知之人爾等四人前赴鎮守兀喇地方將軍處選取識路之人往看明白以便酌量行禮臣等欽奉上諭于五月初四日起行本月十四日至盛京十六日由盛京起行本月二十三日至兀喇地方轉宣 上諭于將軍等隨查兀喇寧古塔及兀喇獵戶所居村庄等處俱無確知長白山之人僉云曾遠望見惟都統尼雅漢之宗族戴穆布魯原係採獵之人今已老退閑口稱我輩原在額赫訥陰地方居住我雖不曾躋長白山之巔曾聞我父云如往獵于長白山脚下獲鹿肩負以歸途中三宿第四日可至家以此度之長白山離額赫訥陰地方不甚遙遠我不知其他等語因訪問雖不曾至長白山如赴額赫訥陰地方水路幾日可至陸路幾日可至亦有知往額赫訥陰地方陸路之

人否據管獵戶噶喇大額黑等口稱如乘馬由陸路前赴額赫訥陰地方十日可至如乘小舟由水路而往途中全無阻滯二十日可至倘遇水漲阻滯難計日期有獵戶喀喇者知赴額赫訥陰地方等語臣等隨議每人携三月糧而往又思或三月糧盡或馬匹倒斃不能歸家亦不可定隨語鎮守寧古塔將軍巴海可載一船米于額赫訥陰地方豫備倘我輩米盡以便于彼處取用將軍巴海云大船不能過松阿里河大險處當即載米十七小船至額赫訥陰地方豫備臣等即擬于六月初二日起行又思由水路而往倘遇水漲阻滯稽遲時日不能即至因與噶喇大額黑約我輩乘此馬匹肥壯速由陸路往看候看過長白山回時再由水路逆流而上前赴額赫訥陰地方約定臣等帶領固山大薩布素于六月

初二日起行經過文德痕河阿虎山庫勒訥林祁爾薩河滄沱河沙布爾堪河納丹佛勒地方輝發江法河木敦林巴克塔河納爾渾河敦：山卓龍窩河等處及至訥陰地方江干不意噶喇大額黑乘小舟而行半月程途七日齊至因語固山大薩布素我輩乘小舟由江中逆流前赴額赫訥陰地方汝帶領官兵馬匹由瓦努湖河逆流而上由佛多和河順流而下前來額赫訥陰相會約定遣發去後臣等于十一日至額赫訥陰地方固山大薩布素等于初十日已至因前進無路一望林木臣等與固山大薩布素商議令薩布素閒散章京喀達與識路徑之喀喇帶領每旗甲士二名前行伐木開路并諭如望見長白山可將行幾日方得望見有幾許路程相度明確來報我輩任二日亦即起行矣隨于十二日遣

發前行去後本日據固山大薩布素差人顧素前來報稱我等別大人們行三十里至一山頂上望見長白山不甚遙遠似止有一百七八十里等語又續差艾喀來報稱先差人來後又至一高山頂上望見長白山甚明約有百餘里山上見有片：白光等語臣等趁未有雨水之時急往看驗長白山因留噶喇大額黑督捕珠玕于十三日起行十四日與固山大薩布素等會于樹林中揣摩開路前進十六日黎明聞鶴鳴六七聲十七日雲霧迷漫不見山在何處因向鶴鳴處尋路而行適過路蹊由此前進直至長白山脚下見一處周圍林密中央平坦而圓有草無木前而有水其林離住札處半里方盡自林盡處有白樺木宛如栽植香木叢生黃花燦爛臣等隨移于彼處住札步出林外遠望雲霧迷山毫無所

見臣等近前跪誦 綸音禮拜甫畢雲霧開散長白山歷歷分明臣等不勝駭異又正值一路可以躋攀中間有平坦勝地如築成臺基遙望山形長闊近觀地勢頗圓所見片：白光皆冰雪也山高約有百里山頂有池有五峰圍繞臨水而立碧水澄清波紋蕩漾殊為可觀池畔無草木臣等所立山峰去池水約有五十餘丈地週圍寬濶約有三四十里池北岬有立熊一望之甚小其繞池諸峰勢若傾頽頗駭瞻視正南一峰較諸峰稍低宛然如門池水不流山間處：有水由左流者則為扣阿里兀喇河右流者則為大訥陰河小訥陰河繞山皆平林遠望諸山皆低相視畢禮拜下山之際峰頭有鹿一羣他鹿皆奔獨有七鹿如人推狀自山峰陸續滾至山下閒散章京畢楊武里等駐立之處臣等不勝駭異因

思正在之食此殆山靈賜與欽差大臣者隨望山叩謝收其七鹿
臣等上山之時原有七人也自得鹿之處退至二三十步回首瞻
望又忽雲霧迷山臣等因清淨勝地不宜久留于十八日言旋回
見先望見長白山之處因雲霧蒙籠遂不得復覩山光矣二十一
日回至二訥陰河合流之處二十五日回至恰庫河北河乃訥陰
東流會合之所二十八日正行之際適遇頌到 敕旨臣等不勝
歡忭捧讀 敕旨感激靡盡當經叩頭恩訖二十九日因馬瘦不
堪馳驅自恰庫河水路乘小舟而歸經過色克騰險處圖白黑險
處噶爾漢險處噶大渾險處薩滿險處薩克錫險處法克錫險處
松阿里大險處多渾險處乘一葉小舟歷此大江九險得以無恙
而渡者皆仰賴 皇上洪福之所致也七月初二日回至兀喇地

方又往看寧古塔等處地方于本月十二日至寧古塔徧看會寧
府等處地方畢于七月十七日自寧古塔起行八月二十一日抵
京師臣等奉 命于人跡罕到之處創闢路徑行于不見日色深
林之內無一日阻滯得見長白山皆我 皇上敬念 祖宗誠心
感格神明之效也緣係欽差事宜謹疏奏聞奉 旨長白山 祖
宗發祥重地奇蹟甚多山靈宜加封號永著祀典以昭國家茂膺
神貺之意着禮部會同內閣詳議具奏禮部覆疏金史大定十二
年封長白山為興國靈應王明昌四年又加封開天弘聖帝明洪
武三年並去嶽鎮王公封號止稱為神今 本朝祭五嶽五鎮俱
稱嶽鎮之神相應將長白山封為長白山之神相擇吉地建祠照
五嶽每年春秋二季致祭 祀所行禮儀應用等物亦照五嶽令

未建祠之前應 特遣大臣往封致祭其封神祭文及每年春秋
二次祭文交與翰林院撰擬工部酌量題請建造祠宇成日始行
春秋二祭可也奉 旨這建祠致祭事宜着再詳議具奏

縣名避年號

順治中改嘉興府崇德縣為石門縣以避 太宗年號也明穆宗
朝亦改隆慶州為延慶州許重熙五陵注略曰宋時皆改郡邑名
以就年號如祥符紹興之類國初亦以洪武名其門避年號非古
也

玄狐

本朝極貴玄狐次貂次猞猁獬豸惟王公以上始得服康熙十
一年重定衣服等威之制三品以上始得服貂及猞猁獬豸未久復
故 日講官每歲賜貂自滇中告變停賜康熙十九年乃徧賜諸
官九人

可入

日... 中... 告... 十... 六...

池北偶談

談往

駱金吾

駱養性字秦如京師人崇禎朝為大金吾能魚山開姜如農塚二

公俱以直言得罪下錦衣獄一日漏下二鼓一小中官持懷宗御

筆至云諭駱某即取熊姜二犯絕命繖駱附奏繖旨畧云言官果

有罪當明正典刑與天下共棄之今昏夜以片紙付臣殺二諫官

臣不敢奉詔奏上帝怒為之霽二公皆得不死駱至順治中尚在

宋荔裳嘗識之

薦隱逸

康熙十年浙撫范中丞薦山林隱逸鄞縣葛世振明崇禎庚辰第
二人翰林編修也既以老疾辭不赴復奉 溫旨敦迫再以疾辭
遂允其請又薦布衣董漢策以科道試用尋為御史劾罷至下諸
法司而秦督鄂善薦藍屋布衣李顥辭不至顥起田畯嘗一就科
舉遂隱居讀書修明橫渠藍田之學富平李天生因篤昔嘗為予
言之

蔡卞白敏中

人有不可以一節取者宋史載蔡卞歷揚廣越潤陳五州廣州寶
貝叢湊一無所取及徙越夷人清其去以薔薇露洒衣送之即此
一事論之雖與沉香載石同稱可也而乃出于卞之巨姦白敏中
在郎署李衛公器之多所延譽遺錢十萬俾會省閣諸公宴已有
日時秋霖涉旬賀拔惠員外求官不得將欲出京來別惠與敏中
同年閤人告以方候朝官惠駐車留書叙灞遊之困敏中得書歎
曰士窮達當有時命豈有美饌上邀當路豪貴而反遺故人遂召
惠先宴既而朝貴聞與惠宴衆皆去異日敏中謝衛公以留故人
負于推引衛公稱之曰此真古人所為以此一節觀之敏中過人
遠甚然史稱敏中受知德裕薦知制誥尋為翰林學士至大用及
德裕之貶詆之不遺餘力議者訾惡敏中相業略無足稱怙威肆
行卒謚曰醜而黨附宗閔橫斥衛公尤為當世鄙薄秦太虛著論
謂敏中不獨負德裕抑且負國家

孔公父子

史載孔道輔原魯使契丹優人以文宣王為戲道輔艱然徑出澠

水燕談載元祐中上元駕幸迎祥池宴從臣伶人以先聖為戲刑部侍郎孔宗翰奏唐文宗時有為此戲者詔斥之今聖君宴犒群臣豈容有此詔付檢官置于理二事絕相類宗翰字周翰即原魯子也宋至道二年皇太子諸王宴瓊林苑教坊以孔子為戲賓客李至言唐太和中以此為戲文宗答伶人以懲無禮魯哀公以儒為戲尚不可况先聖乎

池北偶談

濟南王士禛阮亭著

談獻

米元章二壻

段拂吳激皆米元章之壻拂字去塵元章有潔癖見其名字喜曰既拂矣又去塵真吾壻也以子妻之拂南渡後仕至叅知政事激字彥高入金為翰林學士以詩樂府知名與蔡松年齊名號吳蔡體

兩郝天挺本末

金元間有兩郝天挺一為元遺山之師一為遺山弟子余考元史郝經傳云其先潞州人徙澤州之陵川祖天挺字晉卿元裕之堂

從之學裕之謂經曰汝貌類祖才器非常者是也其一字總先出于魯別族父和上拔都魯元太宗世多著武功天挺英爽剛直有志略受業于遺山元好問紫拜河南行省平章事追封冀國公謚文定為皇慶名臣嘗修雲南實錄五卷又註唐人鼓吹集十卷元時漢人賜號拔都惟史天澤張弘範見輟畊錄漢言勇也近常熟刺鼓吹集乃以為隱逸傳之晉卿而致疑于趙文敏之序稱尚書左丞又于尚書左丞上妄加金字悞甚

魏尚書格言

蔚州魏環溪尚書象樞順治中以光祿丞養親家居臘闕以臨胸馮相國易齋溥薦起為御史不五載至尚書所著有庸齋聞語與薛文清讀書錄同旨偶錄數則于此○有不可知之天道無不可知

之人事○好名是學者病是不出字者藥○居大臣而德不純學不粹如下僚居下僚而政不平刑不中不如素士為士而理不明學不正不如庶民○偶見水與油而得君子小人之情狀焉水君子也其性涼其質白其味冲其為用也可以澣不潔者而使潔即沸湯中投以油亦自分別而不相混誠哉君子也油小人也其性滑其味濃其為用也可以污潔者而使不潔倘滾油中投一水必致搏激而不相容誠哉小人也○五倫之外無道六經之外無文四書之外無學○貧賤立品富貴立身方是天地間真男子○成德每在困窮敗身多因得志○為仙為佛論死後地位為聖為賢論生前地位此虛實有無之別○世間第一等可敬人忠臣孝子世間第一種可憐人寡婦孤兒○恭謹忍讓是居鄉之良法清正

儉約是居官之良法。○吳芾云與其得罪于百姓不如得罪于上官李衡云與其進而負于君不如退而合于道二君皆宋人也合之可作出處銘。○父母有過子猶幾諫諭親于道心無欺慢兄弟有過豈容背詛面吐衷腸誰能離間匿怨而友良朋所患一人作偽一家習慣骨肉手足譁張為幻人而異情犬豕之秦

圖讖

漢光武好以圖讖決事宣布天下桓譚以此得罪而符堅以讀讖殺王彤王佩此一事過光武遠矣其後乃以讖文入五將山竟為姚萇所執當是末路憤之耶

朱彤

朱彤京兆人隱居不仕閭負使涼以彤與王猛並稱堅以猛為侍中猛表讓于彤其後猛死堅欲南寇引群臣會議太極殿符融石越等皆諫彤獨贊之卒致淝水之敗以至亡國此豈景略匹耶處士盜虛聲何代無人

曹植司馬順

吳江顧生庶其萬三餘漫筆云三叔周之叛臣寔殷之忠臣也說本陳同父若曹丕篡漢陳思王植蒙服而哭司馬炎篡魏習陽亭侯順歎曰事乖唐虐而假為禪名逐悲泣由是廢黜而卒二公非漢魏之忠臣歟

鄒道元

鄒道元史稱嚴猛為中尉汝南王悅嬖人丘念弄權縱恣道元收付獄悅請于胡太后太后怒之道元殺念并劾悅時蕭寶寅在閔

中反狀已露悅遂奏道元為閩右大使行至陰盤驛遇害世但知其文士耳

二王好佛

王右丞兄弟好佛多與名僧游處其山川梵宇之作往往精妙然唐書王縉傳載縉喜飯僧徒對揚啓沃輒以因果為證每西番有警輒使群僧誦仁王經懷之大曆刑政日以凌遲縉又縱弟妹女尼等廣納賄賂如市賈焉孟子謂頌詩讀書必知人論世旨哉言乎

朱浚

盧奕之有杞華原柳氏之有璨韓忠獻之有侂胄吳玠吳璘之有逆曦所謂君子之澤五世而斬也何燕泉餘冬序錄載朱文公曾孫浚為浙漕值賈似道當國時每有劄子白事必稱某萬拜按文公世系公長子塾生鑑生浚仕至朝散大夫右文殿修撰兩浙轉運使吏部侍郎丙子元兵至福安州浚不屈死之浚能殺身成仁而不能不失身于權貴明末亦有之如張捷楊維垣是也浚死節事宋史及綱目皆不書

蘇門孫先生言行

蘇門孫徵君鍾元先生^奇以康熙乙卯卒年九十二矣其自贊云問爾為誰曰歲寒以歲既云寒爾何為爾曰勿讀書妄意青紫長知立身頗愛廉耻雖困公車屢蒙薦起骨脆膽薄不慕榮仕衣厭文繡食甘糠粃隱不在山逸不在水隱于舉人七十年矣繞膝多男及門有士老而學易欲探厥旨聊以卒歲如斯而已○先生十

四歲謁楊忠愍子尚寶補庭補庭問設在圍城中內無糧外無
救援當如何先生應聲曰効死勿去尚寶歎曰足卜子生平矣○
天啟中左浮丘魏廓園周蓼洲三公以璫禍被逮皆先生與鹿忠
節善之父及其甥壻張于度果中周旋于患難之中左公弟光明
魏公子學伊周公友朱祖文皆主其家入與高陽孫文正公書曰
左魏諸君子善類之宗橫被奇冤誰不扼腕昔盧次樞一莽男子
耳謝茂秦以眇布衣行哭燕市曰諸君子不生為盧生地乃從千
載下哀湘而弔賈乎李獻吉在獄何仲默致書楊遂菴求為引手
康德涵義急同調至不自愛其名浮丘廓園之品固當直踞獻吉
何次樞敢望其一介書生尚負慚于茂秦閣下功德前無遂菴憐
才扶世之感諒必激于中豈無意乎及三公死各坐賊數千先生

又與鹿太公醮金代上之先生晚年語門弟子云吾生平尚友凡
三變乙丑丙寅之際則慕陳太丘郭林宗癸甲之間則管幼安田
子春今耄矣其惟衛武公乎○奉聖夫人客氏弟光先介所知以
名馬貽先生以家貧不能具芻茨辭光先再致養馬之需以病軀
不能乘辭

自此古人

王儉自此謝文靖張潛自此裴文忠王昭遠自此諸葛忠武侯

史閣部

康熙二十年吳江吳漢槎北自寧古塔歸京師駐防將軍安某者
老將也語之曰子歸可語史館諸君昔王師下江南破揚州時吾
在行間親見城破時一官人戴巾衣鞞騎一驢詣軍營自云我史

閣部也 親王引與坐勸之降以洪承疇為此史但搖首云我此
來只辦一死但慮死不明白耳 王百方勸諭終不從乃就死此
吾所目擊者史書不可屈却此人云

乙將軍

乙將軍邦才山東青州人以摠真官隨史相守廣陵同日授命

任太守

任民育山東濟寧人中甲子乙榜為揚州知府亦不屈死志皆鞅
之

李忠定公從祀

宋南渡人物李忠定公第一張魏公生平不强人意處甚多而為
宋齊愈劾罷忠定尤南渡治亂之関予往讀名臣言行錄恒欲著

論以明之頃見鄧左之履張浚不當從祀歷代帝王廟議明白正
大千古定案遂為閣筆其略云建功于中興之際首當聯絡公忠
之人宋至靖康建炎之間人臣皆以緘默柔媚輸國于人為奉職
而以恢復雪耻為不忠宋齊愈黃潛善汪伯彥之徒其尤也非李
綱秉國整立規畫何以成朝廷哉浚乃甘以身為潛善客與齊愈
厚而隱其書立邦昌之罪劾綱以私意殺侍從致綱罷黜綱罷而
兩河相繼淪陷失身非類得罪君子雖有隨時倖立之功名而其
虧喪已不可贖矣夫從祀重典也謂宜黜浚而陟綱云鄧有仰
止堂文集清峭可誦

朱子論蘇王

孔文仲號正人而攻伊川至謗為五鬼之魁朱子以蜀洛之故甘

言金談獻
心蘇氏更有甚焉其與汪尚書云蘇氏之學害天理亂人心妨道術敗風教不在王氏之下其徒若秦觀李廌皆浮誕輕佻士類不齒云至其推尊張浚全以南軒交誼甚矣不黨之難也可歎

二蔡後

文丞相云甫中有二蔡其一派出君謨其一派出京卞京卞子孫慚其先人所為多自詭為君謨後子頃見江右齒錄分宜相子孫中式者竟不列其高祖名爵孝子慈孫百世不改可畏哉

牧齋詩傳

錢宗伯牧齋作列朝詩傳本仿中州集欲以元史固稱淹雅然持論多私殊乖公議略舉一二如徐有貞陸元以桑梓之故一則稱其文武兼資一則舉其功在社稷欲以一手掩萬古人耳目可乎

哉李文鳳月山叢談云徐有貞力主南遷之議及貞性險賊云云今吳人舉其鄉望名臣以有貞為稱首上自王濟之下及今時能言之士莫不皆然後世宜有公論固不始于牧齋也

重師

漢人最重其師門生故吏至有棄官行服者荀爽師事李元禮貽書云久廢過庭不聞善誘陟岵瞻望惟日為歲直如子事父矣薄俗要當知此膺以爽父淑為師

蘇少公葬土

眉州墓頤小有老翁泉葉石林云東坡晚亦號老泉居士墨莊漫錄云蘇黃門薨于許王定國作挽詞云徒泣巴山路空悲蜀道程弟兄仁意達千古各垂名注云公與東坡常泊巴江夜雨相約伴

還蜀竟不果歸今東坡葬汝公歸眉王祥有言歸葬仁也留葬達也又少公自作穎濱遺老傳云先君之葬在眉山之東昔嘗約祔于其廬雖遠不忍負也又卜居賦序云昔先君相彭眉之間指其庚壬曰此而兄弟之居也今子瞻不幸已藏邽山子年七十有三異日當追蹈前約昔貢少翁為御史大夫年八十一家居琅邪一子年十二自憂不得歸葬元帝哀之許以王命辦護其喪譙允南年七十二終洛陽家在巴西遺令其子輕棺以歸今予廢棄久矣少翁之寵非所敢望而允南舊事或可庶幾其賦云諸子送我歷井捫天庶幾百年歸掃故阡按長公葬汝州郟城縣釣臺鄉上瑞里嵩陽峩眉山少公祔焉今河南志并載二公墓而四川志止載老蘇墓不及少公定國之詩遺老傳卜居賦之語豈不果耶兄徐

東癡

夜

過書來訂此疑因書此復之

介推

說苑介子推十五為荆相堂下有二十五進士堂上有二十五老人是又一介子推也

葉文莊論陶南村

孫大雅作滄螺集有陶南村傳載其不應制帥泰不花南臺御史丑驢辟舉張士誠開府姑蘇以軍諮屈之亦謝不往洪武癸丑命守令舉人才復以病免菰圃種菊有靖節之風又稱其所著輟耕錄文獻足徵其人品著述為世所重如此乃水東日記謂書史會要為楊文貞所不取又謂輟耕錄可鄙豈惡其人者惡及儲胥文莊亦有所不免耶何惟黃之過至此

蔡趙二相子

蔡條京之子撰西清詩話宣和五年或言條論議專以蘇軾黃庭堅為本奉旨特落職勒停見吳會漫錄后山居士集有與魯直書云正夫有幼子明誠頗好文義每遇蘇黃半簡數字必錄藏以此失好于父正夫挺之字也蔡趙輩勢能禁天下不敢習蘇黃詩文而不能得之于其子異哉明誠撰金石錄

歐劉

劉原父與永叔相友善然原父常言好箇歐九可惜不讀書仁宗嘗問宰執劉敞何如魏公極稱其才歐對曰劉敞文亦未佳其博雅足重也二公似以名高相失後村江南道中詩云每朝介甫行新法常恨歐公不讀書浩歎諸劉今已矣路傍喬木日蕭疎

梅宛陵取士

元人劉性作宛陵集序云仁宗嘉祐二年歐陽公知貢舉梅聖俞為試官得人之盛若眉山蘇氏南豐曾氏郟張氏河南程氏皆出其間葉石林詩話謂是榜得蘇子瞻為第二人子由及曾子固皆在選中今人止知蘇曾為歐公門生不知張程二氏皆出其門矣又東坡兄弟生于六一師弟之分極深然于宛陵祇稱梅二丈亦所未解

謚文公

劉後村云謚古也復謚非古也封演云謚二字者一字為文一字為質世言歐陽永叔卒將謚文常秩時為太常博士議當謚文忠或謂必留此以待介甫已而果然了唐宋以來謚文者獨韓退之

朱元晦為不愧他如白居易李翱陸希聲權德輿楊億王安石姚燧歐陽玄輩皆謚文亦不盡允也獨孤及云二字不必為褒一字不必為貶果在字數則元堯舜禹湯文武不如烈威慎靚王也齊桓晉文不如趙武靈秦莊襄楚考烈也唐人論如此則謂文必優于文忠亦未必然初元晦謚文忠劉後村時年十七代其父尚左作駁議因止謚文其略曰正文庶民之學鬱而未伸著書立言之功大暢于後合文與忠謚公似矣而非也有功于斯文而謂之文簡矣而實也請以韓子之謚之公右謚議見後村集第二十五卷

二王公薦士

宋王文正公在政府謹惜名器歛進材品使人各得其所雖弗于已者亦不以私廢公王沂公當國未嘗顯拔一人范希文以為言公曰恩若已出怨將誰歸二公真古大臣之風下此則朋黨而已又下此則賄賂而已

孔明之學

徐莊裕公問讀書續記云漢儒為學能見得靜字惟孔明一人學以廣才靜以成學等語亦得規模領要

穆文簡論王安石

堂邑穆文簡公暉弘治中鄉舉領解出王文成公之門為理學大儒然其學多入禪宗其古文精勁自子書出可匹崔文敏公後渠如送沈朝綬送王如行諸序可見予尤喜其與武城王文定公道論王介甫書今錄于此孔暉頓首純甫先生足下昨在陽明先生

坐上同觀象山荆國祠堂記予時未敢謂然者必象山之意多為
荆公恕不為人之社稷計不為天下生靈憂不為後學慮恕一夫
而不憫天下後世此何心哉不然乃象山之偏見自喜也將以正
名定罪釋天下蒼生之憤為社稷大計不當姑隨也大舜殛鯀于
羽山鯀之惡不大于安石安石之罪浮于鯀余謂以安石擬鯀可
也鯀名重安石亦名重鯀悻直自用安石亦悻直自用鯀地族安
石亦地族鯀陞泊安石亦陞泊鯀不能除天下之害亦不能成功
安石禍及天下生靈生靈何辜宋之元氣遂不復振其罪尚為不
浮于鯀乎夫以傾人社稷流毒四海者尚取其志堯舜嘗取鯀之
志矣何者鯀之志欲平水土也孟子曰食志乎食功乎安石之操
介在古人一節之士甚多未可以一節而掩元惡也非聖人無六

聖人作春秋以訓萬世安石獨廢之此不容誅矣安石秉周禮蓋
功利之心勝也何者周禮之政天無曠時地無曠利人無曠力此
聖王所以畜天下者盡三才之道者也安石慕其近似專以利言
又無管仲之才所以萬無一利而害不可勝言矣天下以為君子
者安石惡之天下以為小人者安石好之好人之所惡之人之所
好此之謂拂人之性辟則為天下僂矣欲恕安石者是求為過高
之論恐誣後學不淺不審聰鑒以為何如孔暉頓首

三進士出處

本朝進士出身最奇者三人一予同年任暄猷杞縣人明末團結
鄉勇以禦流寇南渡授官後軍府左都督靖邊伯 豫王下江南
後誠遂隸旗下中順治壬辰進士以磨勘被黜復中乙未進士官

至江西贛南道僉事一吳李芳邵陽人崇禎己卯舉人粵西時官至左都御史授誠願以科第進中康熙甲辰進士一錢世燾五河人南渡為副撫兵官既而為浮屠久之復補諸生中康熙庚戌進士年已七十餘未幾卒

蘇章事

宋人小說載坡公與章惇題名石壁事頃見者舊續聞又一事極相類子厚為商州推官子瞻為鳳翔幕僉因差試官開院同途小飲山寺聞報有虎二人酒狂同勒馬往觀去虎數十步馬驚不前子瞻乃轉去子厚獨鞭馬向前取銅鑼于石上戛響虎遂驚竄謂子瞻曰子定不如我舊聞乃樵李項氏抄白本也

徐公長者

宣城徐翁尚書元太父官浙江某縣典史偶以言忤巡按御史受辱扑責羞憤自免歸時尚書與弟通政元氣皆失學翁每流涕忽不樂尚書兄弟跪請其故曰而兄弟皆廢學吾無後矣因述受扑直指事復流涕不已尚書兄弟曰兒輩不類自今願力學以慰大人心願勿悲也乃發憤下帷兄弟相繼登第尚書謁選得某府推官即直指之家也心私喜得報父怨瀕行置酒戚友畢集候翁出稱觴翁稱疾堅卧不起尚書入跪問故且言此行真得報夙怨何反不樂為翁曰此吾所以病也吾為小吏當日誠不為無過但直指稍過當耳且緣渠扑責激而罷歸教子以有今日則直指乃吾恩人非仇也汝思報怨吾所以病汝往當以吾言開心告之盡捐夙嫌是吾子也否則非吾子也尚書唯唯翁乃起盡歡而罷時

直指以失職家居聞尚書來恐其郊迎盡禮尚書首述父命誓無芥蒂自是情好甚洽後翁濟大耋三子皆成進士兩登九列焉此與蔡確父黃裳瀕死屬其子必報陳氏確既登政路遂以事實恭父子世儒極典賢不肖霄壤矣

魯仲連

新城東北錦秋湖上有魯仲連陂傳為魯仲連所居按前書魯仲連子十四篇在儒家

轅固

新城有地名牛固相傳轅固故里也未知所據前書藝文志齊后氏故二十卷齊孫氏故二十卷齊雜記十八卷轅固齊人說詩獨不見于班史：但云魯申公為詩訓故而齊轅固燕韓生皆為之

傳或取春秋采雜說咸非其本義云

秦檜復謚

宗寧宗嘉泰四年追封岳飛為鄂王開禧二年追奪秦檜爵謚謬醜此天下萬世公議然實韓侂胄欲用兵而先有此舉也乃邊釁既開又誅侂胄以媚敵遂復秦檜爵謚則諱矣

楊國忠

天寶九載楊國忠請復張易之兄弟官爵陸務觀詩何至詔書褒五郎是也此與宋復秦檜謚明英宗立王振廟同

韋蘇州

韋蘇州史失為立傳宋沈明遠始補傳其生平端末終亦未詳集中有逢楊開府一篇少事武皇帝亾賴恃恩私云：後人遂疑為

言金談獻
三衛而韻語陽秋因附會以為恃韋后宗族云々藝語武斷可笑
腐儒之見乃如此

王文成

王文成公為明第一流人物立德立功立言皆踞絕頂康熙中開
明史館秉筆者訾警太甚以友葉文敏方時為總裁予與之辨論
反復至于再四二十二年四月上宣諭湯侍讀荆峴斌令進所
著詩文且蒙召對中有王守仁論一篇上閱之問湯意云何
湯因對以守仁致良知之說與朱子不相刺謬且言守仁直節豐
功不獨理學上首肯曰朕意亦如此睿鑒公明遠出流俗之
外史館從此有定論乎

仁宗徽宗

元臣巖々曰宋徽宗諸事皆能獨不能為君耳炙輅錄記周正夫
曰仁宗皇帝百事不會只會做官家此語在巖々之前可謂絕對

蘇叔黨大節

宋人議蘇過叔黨附梁師成師成妻死為服總麻云云頷略其大
節元表伯長清容集有跋叔黨竹石牧牛圖云小坡竹石緯有父
風後倅定武罵賊不屈死之其氣節不墜光于前人矣事詳揮塵
錄劉後村跋小米畫云叔黨之才百倍元暉元暉至侍從叔黨死
小官命也夫揮塵錄又載叔黨政和中召入禁中畫窠石而終不
遇

武林起復

予嘗謂楊武陵奪情事後人論之過刻聞之山長教授岱云其父

客嚴首昇周聖楷輩為武陵所抑遂騰謗書又當時與黃石齋先生矛盾故論者多少之耳予按禮曾子問云子夏問曰三年之喪金革之事無避也者非與子曰吾聞諸老聃曰昔者魯公伯禽有為之也注曰魯有徐戎作難喪卒哭而征之公羊傳閔子要經以赴公難退而致位以究私恩春秋亦紀晉襄公墨練之事漢唐以來遂有起復之禮熊改齋漫錄云前漢翟方進喪既葬二十六日除服起視事後漢桓為太子太傅以母憂自乞聽以大夫行喪踰年賜牛酒奪服宋王性之默記云本朝不獨宰相即百執事皆起復惟富鄭公以太平而辭儒臣如湯大年王元之晏元獻皆未持服富公之後如陳升之亦百日起復此蓋朝廷體貌况在兵革之際云云按已上諸公非盡有金革之事若武陵則金革之事

也頌論者不責彼而責此何歟又考明初名臣亦多起復至羅一峰論李文達彼此風始息奪情固非美事然南陽以一峰武陵以石齋獨愛惡名則不幸也聖楷字伯孔湘潭人有才名後為獻賊偽常德知府發掘楊相祖墓最慘卒為獻賊所殺

兩蕭后

遵聖道二宗享國皆最久皆有宮闈之變聖宗仁德皇后善琵琶法天后稱斤誣其與琵琶工燕文顯李文福通投書聖宗寢帳聖宗不之信其後竟為稱斤所殺道宗宣懿皇后工詩尤善琵琶耶律乙辛誣其與伶官趙惟一通構死才藝足為婦德之累况可耽音樂乎仁德事載昇丹國志遼史本傳不載宣懿事詳焚椒錄

李師中

蘇明允預議荆舒之姦人皆服其先見同時李待制師中因邸吏報包希仁叅政或曰朝廷自此多事矣師中曰包公無能為今鄴令王安石者眼多白甚似王敦他日亂天下必此人明允擬之王夷甫盧杞師中擬之王敦其識不相上下皆不減張安道呂獻可令人但知老泉何

初夫人劉太夫人

先始祖妣初夫人諸城人年始笄一日忽為大風吹至新城之曹村時始祖琅琊公方為某大姓傭作未婚遂作合焉三世至穎川公而讀書仕官四世至太僕公始大其門二百年來科甲蟬連不絕皆祖妣所出也萬曆中吳門伍袁萃著林居漫錄記其事後嘉興賀燦然作漫錄駁正于此條下云王氏之興必有陰德此類語

怪云、不知此事乃寔錄也。○又先司徒公萬曆間以終養告歸舊有撫楚時銅瓜二命工鎔之忽成峰巒洞壑之狀及南極老人西王母八仙之形無不酷肖是日先高祖妣一品劉夫人九十壽辰也觀者皆悚異此事載朱平涵相國國槓湧幢小品中伍以王氏發祥于司徒公而不云太僕公則誤也太僕公登嘉靖辛丑進士司徒公登嘉靖壬戌進士謂司徒公登丁未進士亦誤朱公小名又記先太師公宣大出粟事謂推之九邊皆可行然謂為王見菴中丞誤也先司徒公別字見峰太師公別字霽字未筆誤耳

邊大綬

明末任丘人邊大綬為米脂令發賊李自成祖父墓賊旋敗衄走死王氏聞見錄載唐末巢寇犯關一道人詣安康守崔某請斷黃巢谷金統水泉源中得窟、中有黃腰人舉身自撲而死道人曰吾為天下破賊訖未幾巢滅大駕還京古今事相類乃如此

歆向

後書祭遵傳詔與驍騎將軍劉歆武威將軍劉向等伐公孫述按
劉植傳歆植之從兄字細君與植弟喜皆繼植為驍騎將軍封浮
陽侯向植之子嗣植為昌城侯徙封東武陽侯歆乃向之從伯父
也

二八俊八顧八及

東京之末黨人有八俊八顧八及之名太學所標榜也李膺杜密
以下為八俊郭泰范滂以下為八顧張儉劉表以下為八及至儉
鄉人朱竝上書告儉與同鄉二十四人別相署號共為部黨財以
儉及檀彬褚鳳張肅薛蘭馮禧魏元徐乾為八俊田林張隱劉表
薛郁王訪劉祗宣靖公緒恭為八顧朱楷田繁疎耽薛徽宋布唐

龍羸咨宣褒為八及中間惟張儉劉表同餘皆異名字

兩黃祖

孔融為北海相左丞黃祖勸融結袁曹融怒殺之此別是一黃祖
皆漢末人

樓護養呂公

前書樓護傳護為廣漢太守莽子宇與呂寬謀以血塗莽第門發
覺莽怒殺宇而呂寬亡寬父與護相知寬至廣漢過護到數日有
捕寬詔書至護執寬莽大喜徵護入為前輝光又云護有故人呂
公無子歸護身與呂公妻與呂姬同食及家居妻子頗厭呂公護
聞之流涕責其妻子曰呂公以故舊窮老託身于我義所當奉遂
養呂公終身按此呂公即呂寬父所謂與護相知者當是既執獻

寬而收養其父母耳護出入王氏以勢利交得官又患難中殺故人子以媚權奸縱養其父母終身罪難末減孟堅既誤收之游俠傳中又載此事以為美談首尾自相矛盾又誤之誤者也

司馬公和安石詩

司馬文正公為中丞奏彈王安石言非行偽王制所誅非曰良臣實為民賊安石亦云自新法之行始終以為不可者司馬君寔也公集中載和安石二詩如安石明妃曲云漢恩自淺胡自深公則云妾身生死知不歸妾意終期寤人主和烘蝨云醞酸蝨聚理固然爾輩披攘我當坐直如水火杓鑿之不相入而君子小人之用心亦可見矣張子韶云溫公之門一傳而得劉器之再傳而得陳瑩中介薦之門一傳而得呂惠卿再傳而得蔡確三傳而得章惇

四傳而得蔡京五傳而得王黼

張獻忠黃巢

張獻忠亂蜀日城市祠廟焚燬無遺唯于梓潼縣七曲小張亞子廟盛有增飾遇張桓侯廟亦不敢燬唐黃巢之亂所過多被殺傷然獨厚于同姓如黃姓之家及黃岡黃梅等縣皆以黃字得免盜賊行事相類如此

叢氏

文登叢大司空蘭本漢松侯金日磾之後相傳日磾四十五代孫永遷縣之叢家峴家焉遂以為姓至今科名甚盛江西多塗氏舊傳亦日磾後有金賦者為制置使宋高宗為加點水遂有塗姓詳載于皇華紀聞

言金談獻
耿逸菴張仲誠

耿介字逸菴河南登封人順治壬辰進士翰林簡討遷大名道副使康熙丙寅臘月禮部尚書掌詹事府湯潛菴斌疏薦之略云原任翰林院簡討轉直隸大名道副使丁憂回籍河南登封人耿介賦質剛方踐履篤實服官冰蘖自矢家居淡泊自甘潛心經傳與有淵源今雖年逾六旬精力尚健老成宿素罕見其儔邇者皇上念衛既齊之賢復其原官凡有寸長誰不思奮臣有具最下恩遇過隆豈敢竊位蔽賢自昧舉知之義倘蒙鑒區愚誠將命徵取來京賜以引見可否錄用自有睿裁非臣愚所敢擅議也云云吏部覆准下河南巡撫起送入京奉旨從優授翰林院侍講學士未幾陞詹事府少詹事余曩為湯公作繪川書院詩有云襟懷

有耿介上蔡有張沐著書各滿家眾流匯川瀆耿公實廉吏齋厨甘杞菊張公赴徵車萬里向巴蜀正謂是也沐字仲誠順治戊戌進士曾知內黃縣後以魏尚書環溪象樞薦起知四川資縣謝病歸

名平

漢史召平凡兩見一在蕭何傳勸何悉以家私財佐軍得免禍一在齊哀王傳諸呂欲為亂朱虛侯使人陰出告其兄齊王齊王與中尉魏勃謀發兵齊相召平聞之乃發兵入衛王宮使魏勃將勃既將以兵圍相府召平曰道家言當斷不斷反受其亂遂自殺一召平耶智愚之懸殊乃若此

宋兩唐伯虎

宋唐伯虎字長孺初名贍丹陵人庚之兄也治易春秋皆有家法

性孝友史載其迎父瀘南及臨邛獄事時人以為難及附見文苑
傳王鞏隨手雜錄云全州進士唐伯虎至冥司主者放還語伯虎
曰到人間為我轉法華經亦當勸人誦之後仕為梧州推官六十
餘卒

黃綰

黃綰陽明之門人以議大禮附張桂得進用永嘉呼為平原十九
客講學之流弊在此

陳太守

陳龍巖福建晉江舉人累官江寧知府居官以清介聞隨州妖人
朱方旦左道蠱惑四方督撫藩臬所至郊迎為立書院至金陵總
督某公方延之衙署忽轅門傳聲甚急遣問之陳立轅門外直對

云無餘事知府某以方旦左道惑眾請發下鞠審正法以安地
方耳制府雖怒其戇然素知其廉幹亦不罪也後陳卒于任總督
于成龍親弔哭之

足下黑子

畫漫錄云郭忠武使渾忠武瑊洗足見汾陽足下有黑子捧玩以
之汾陽問其故渾答云瑊也足亦有之汾陽令洗而視之笑曰不
及我明皇雜錄安祿山初事張韓公仁愿韓公嘗令洗足韓公足
下有黑子祿山竊視韓公問之祿山曰某賤人也不幸兩足皆有
黑子此公色黑而加大韓公觀而異之因加寵薦兩令公功名相
埒若祿山叛逆亦與韓公相似相豈足貴哉又北夢瑣言載西門
軍容與吳行魯事亦同豈一事而傳聞異詞耶

秦羅子孫

說聽載秦檜裔孫某宰湯陰綽有政聲每欲謁忠武祠輒逡巡弗果將及瓜謂同僚曰少保雖與先世有惡豈在後嗣耶且吾守官無愧神明往謁何害遂為文祭之拜不能起嘔血數升而死事在嘉靖初年魏莊渠提學河南歸為所親言之此與宋御史羅汝楫子鄂州知州願事全相類汝楫附秦檜劾忠武願即著爾雅翼以古文名朱子稱為南渡第一者也

宋公子鮑

春秋文公十六年宋公子鮑禮于國人鮑美而艷襄夫人欲通之乃助之施既而夫人使昭公田于孟諸使帥甸攻而殺之左氏曰書曰宋人弑其君杵臼君無道也予以為丘明之言諄矣弑昭公

者公子鮑為首惡罪不可薄觀鮑日教于六卿之門又竭粟以貸國中此與商人田常革何異襄夫人以祖母欲淫其孫為昭公之不禮手已輒先殺公子即等不昭公不能救令之田欲殺之蕩意諸言之而昭公不敢適諸侯蓋襄夫人平日有馮太后武壘之惡公素畏之而鮑因嬖幸以陰肆其篡弑之謀非一日矣故昭公弑鮑遂立雖曰王姬寔鮑之謀善乎劉原父權衡曰公子鮑為不仁襄夫人為不母而宋公未有無道之寔也且公子鮑欲盜其國而先施于民襄夫人欲通于鮑而遂弑其君宜推公子鮑為首惡不得輕此兩人之罪及惡宋公也昔儒謂左氏是非謬于聖人不

然欤



